

Analisis

American Airlines: pasaheronan tranca... djis un muestra di futuro

Ora hende ta bay compra un perfume caro, e por haya un boter chikito pa e dicidi si e ta bay gasta placa na e perfume mes. Un muestra nan ta yame. Un persona, cu dirpiente ta haya un dolor, mester bay docter pa mira si no ta un advertencia.

Durante ultimo simannan, aeropuerto di San Juan, Puerto Rico, tabata escenario di desastre. Arubianonan, turistanan di tur parti cu kier yega Aruba, a keda tranca na e aeropuerto, cu ta porta pa Aruba. E desesperacion tabata grandi. E ta sinembargo señal di e realidad, cu ta spera Aruba entrante 13 di December ora mucho mas turista cu lo a viaha via San Juan pa Aruba, sea mester busca otro destino of bay Miami pa yega Aruba cu e compania cu a carga turismo di Aruba pa tanto aña. Arogancia den Gubernacion! Un factor, cu no solamente ta demostra incapacidad pero mas ainda ta demostra cu e personalidad cu mester pa goberna un pais, ta ausente.

Pa straño cu ta "take it or leave it" ta worde uza cu hustamente e hende robez. Ora Raoul a drenta oficina pa propone un proyecto cu ta un bon negoshi pa su persona, mester a bisa no y si el a protesta, e ora si por a bise "take it or leave it". Pero e palabranan aki hamas por worde usa contra un compania manera Carnival Cruises, cu ta "leave" y ta laga un cantidad grandi di Arubianonan den desesperacion. No por use cu un American Airlines, cu tabata uno di e factor-

nan grandi, cu a pone Aruba riba pia como destinacion turistico. Tur compania y tur hende por worde reemplaza, manera Nelson Oduber a remarca. Interesante ta, cu e mes a duna e prueba kico por pasa ora reemplaza un persona of compania. Kico a pasa desde a Betico Croes a worde reemplaza pa Nelson Oduber? Segun Nelson Oduber mes e partido a crece. Den problema interno y pa pueblo sigur!

E punto di salida di Gobierno, cu tur hende y tur compania por worde

reemplaza, ta e mentalidad mas peligroso cu por existi. Pasobra e ta un mentalidad mes falso cu e actitud di tene asuntonan importante secreto pa Pueblo, cu no sa ki ora ni con su interes ta worde bendi, ni ki ora ni con pan ta worde kita for di su boca.

Aruba, mescos cu tur destinacion turistico, mester di esnan cu a demostra cu nan ta sirbi interes di Aruba. Ta pasobra a kibra nan, basha nan abao, awe Aruba ta den problema grandi.

Durante ultimo siman, pasaheronan a bira victima di trancamento na San Juan, e porta cu tanto turista di Merca, region Caribense y tanto otro pais a usa pa por a yega Aruba. Kico lo bay pasa ora na December e hub no tey mas? Pasaheronan mester bay China pa subi avion bini Aruba? Of e compania Chines ta bay construi un aeropuerto special pa Aruba na Cuba, competidor turistico di Aruba? Of ta laga e financiador poderoso cu a suta Utilities, bay percura pa un hub?

Kico lo pasa cu turismo di Aruba ora e hub cera na December, mientras Marisol ta sigui yena Aruba cu proyecto turistico? Kende ta trece e turistanan?

Carnival Cruises a demostra cu enberdad tur compania por worde reemplaza. Pero con? Tur e cruceronan hunto por a duna Aruba loke Carnival Cruises tabata dune pa garantia? Con ta bay reemplaza e ruta di San Juan-Aruba? Cuanto compania di aviacion mester?

Durante e ultimo siman, e angustia di pasaheronan na San Juan a duna un señal kico por spera den e temporada halto di turismo 2007-2008, cu e circulo di BBO lo haci mas dificil! Orguyo falso, como arma di hende cu ta traha pa loco, mester worde poni un banda pa vision haya oportunidad. Sinta na mesa awor cu American Airlines. No na rudia, pero riba stul. Pero si cu diplomacia y cu interes di Aruba na vista. Pasobra na final, ta Aruba ta worde destrui!

**BEST
DEAL**

Tel: 5827100

(Pariba di Aruba Bank, Paradera)



TELEFONNAN
DI DIARIO
582-6747
FAX
582-8551

MI LECHI NO TA ZUUR!!

